



**RISALSHAH (empat kiri) dan Doreen (tiga kanan) bersama tetamu lain memotong kek sebagai gimik perasmian.**

# UMS adakan sambutan Hari Kerja Sosial Sedunia 2014

UB 16.3.2014 B8

Oleh YAP SIONG HAN

**KOTA KINABALU:** Sambutan Hari Kerja Sosial Sedunia 2014 yang telah diadakan oleh Fakulti Sekolah Psikologi dan Kerja Sosial, Universiti Malaysia Sabah (UMS) bermatlamat untuk menjayakan seminar isu-isu kerja sosial sekaligus menghargai pekerja sosial sebagai ejen perubahan kepada peningkatan kualiti hidup masyarakat.

Dekan Sekolah Psikologi dan Kerja Sosial, UMS Profesor Madya Dr. Murnizam Haji Halik berkata, sambutan Hari Sosial Sedunia yang diilhamkan Kesatuan Kerja Sosial Antarabangsa (IFSW) antara lain bertujuan untuk mengeratkan hubungan silaturahim di antara pekerja, pensyarah dan siswa siswi kerja sosial.

“Keadaan ini sekaligus memberi peluang kepada pelajar membina hubungan serta menjalinkan kerjasama dengan organisasi dari pengamal profesion yang terlibat secara

langsung dalam kerja-kerja sosial,” katanya ketika merasmikan Sambutan Hari Kerja Sosial Sedunia 2014 di sini kelmarin.

Teks ucapannya disampaikan oleh Ketua Program Kerja Sosial Risalshah Latif.

Menurutnya IFSW adalah sebuah organisasi global yang sentiasa komited memperjuangkan keadilan sosial, hak asasi manusia dan pembangunan sosial melalui promosi profesion kerja sosial, model amalan terbaik.

Selain itu katanya, badan antarabangsa itu juga berperanan untuk memudahkan kerjasama antarabangsa melalui perkongsian maklumat berkaitan bidang kerja sosial.

Hadir sama ialah Pegawai Kerja Sosial Perubatan, Hospital Queen Elizabeth 1 yang juga penceramah jemputan, Doreen Edward.

Bertemakan ‘Krisis Sosial dan Ekonomi: Penyelesaian Kerja Sosial, Sambutan Hari Kerja Sosial Sedunia 2014 diadakan pada kali ke-6 dengan dihadiri lebih 100 pensyarah, tutor dan pelajar Program Kerja Sosial, UMS.